

PROPOSTA DE ACORDO DA CONSELLERÍA DO MEDIO RURAL, DA CONSELLERÍA DE MEDIO AMBIENTE E ORDENACIÓN DO TERRITORIO E DA CONSELLERÍA DE FACENDA SOBRE AS CONDICIÓNS DE TRABALLO DOS AXENTES FORESTAIS E MEDIOAMBIENTAIS.

I. Preámbulo.

A participación dos axentes forestais e axentes facultativos medioambientais abrangue todos os ámbitos da loita contra o lume.

O presente acordo pretende, por unha parte, adaptar a prestación de servizos do colectivo ás novas circunstancias dos incendios, que por diversas razóns se están a producir nun espazo temporal maior do previsto na regulación actual. O maior esforzo que requirirá a nova regulación é necesario compensalo cun incremento da contía que se vén percibindo por produtividade e tamén cunha redución da actividade dos axentes noutros períodos do ano nos que non están esixidos polos incendios forestais.

Por outra banda, a actual normativa en materia de protección do patrimonio natural e da biodiversidade, establece novas obrigas para a consellería con competencias na materia,, sendo o persoal pertencente á escala, como parte dos responsables de esixir o cumprimento da dita normativa.

Por último, o acordo complétase coa previsión de aprobación do regulamento de funcións da nova escala de axentes técnicos en xestión ambiental.

II. Acordo.

Primeiro.- Ámbito de aplicación.

a) Subxectivo.

O presente acordo élle de aplicación aos funcionarios das escalas de axentes forestais, axentes facultativos medioambientais e, tamén, aos que accedan á de axentes técnicos en xestión ambiental.

b) Temporal.

O presente acordo desenvolverase no período comprendido entre os anos 2018 e seguintes, de acordo coa temporalidade nel prevista.

Segundo.- Modificación da configuración dos postos de traballo pertencentes ás diferentes categorías de axentes forestais e facultativos medioambientais.

a).- Os funcionarios das escalas de axentes forestais e facultativos medioambientais verán incrementadas as funcións que teñen encomendadas coa asunción da nova regulación das obrigas de Xestión de Biomasa que resulta da última modificación da lei de incendios, de participación na caso de que fosen requiridos en operativos de emerxencias (busca e rescates), operativos de extinción de incendios en espazos naturais protexidos así como a realización de actuacións de protección e de conservación do patrimonio natural dentro dos espazos naturais protexidos tales como: toma de datos xeoreferenciados, levantamento de planos, inspección e seguimento de ocupacións, cambios de uso do solo, e, fundamentalmente, a vixilancia da correcta xestión da biomasa en zonas incluídas na rede natura 2000 ou limítrofes a esta. Para este último fin, previo ao comezo de cada período que se defina como época de perigo de incendios, emitirán un informe sobre o estado das zonas das redes de franxas de xestión de biomasa do distrito correspondente. Igualmente realizarán as funcións inspectoras establecidas na normativa de patrimonio natural.

b).- Como contrapartida, incrementase o nivel de complemento de destino dos postos das diferentes categorías de axentes no período comprendido entre o ano 2019 e o 2020, a razón dun nivel cada un das anualidades, de tal xeito que:

O 1 de xaneiro de 2019 os complementos de destino 14, 16 e 18 pasarán a incrementarse de forma que quedarán en niveis 16, 17 e 19 respectivamente.

O 1 de xaneiro de 2020 os complementos de destino 16, 17 e 19 pasarán a incrementarse nun grao cada un deles de forma que quedarán en niveis 17, 18 e 20 respectivamente.

O día 1 de xaneiro de 2021 o complemento de destino 17 pasa a incrementarse nun grao de forma que nesta data acada o nivel 18.

O incremento de niveis conleva o incremento de contía correspondente segundo a orde de confección de nóminas no complemento específico asociado.

Terceiro.- Proposta de nova orde de prestación de servizos

Acompáñase mediante anexo.

Cuarto.-Pase a outras funcións do persoal.

Negociarase uns principios de pase **voluntario** a segunda actividade/funcións deste do persoal que teña cumpridos 60 anos que conte ademais cun período mínimo **de 25 anos** de actividade desenvolto nesta escala coa mesma finalidade

que a dita medida ten no ámbito dos bombeiros forestais. O seu establecemento, dado que afecta a funcionarios públicos, debe establecerse mediante lei. A tal efecto as partes asinantes presentarán unha proposta para a súa negociación en mesa xeral e a súa posterior inclusión na lei de acompañamento dos orzamentos da Comunidade Autónoma de Galicia para o ano 2019.

Quinto.- Regulamento da nova escala de axentes técnicos en xestión ambiental.

Créase un grupo de traballo, con participación das consellerías de Facenda, de Medio Ambiente e Ordenación do Territorio e de Medio Rural, para elaborar unha proposta de regulamento de funcións da Escala de axentes técnicos en xestión ambiental co obxectivo de que se publique no Diario Oficial de Galicia durante este ano o decreto de aprobación do mencionado regulamento.

Sexto.- Persoal que presta os seus servizos no Parque Nacional Marítimo Terrestre Illas Atlánticas

O persoal terá unha dependencia, de acordo coa relación de postos de traballo, do Parque Nacional Illas Atlánticas, situado en Vigo, non obstante establececese como centro de traballo calquera das illas dependentes do Parque Nacional.

O carácter especial trae causa no feito de que cando finaliza a xornada de traballo, o persoal ten que permanecer no respectivo arquipélago durante varios días consecutivos

O período mínimo de descanso logo de traballar sete días consecutivos será como mínimo de nove días consecutivos, que se incrementarán en tanto días como festivos haxa na semana que estea no centro de traballo, agás que por cambio de cuadrantes as necesidades de rotación do persoal non o permitan. Neste suposto compensarase nos descansos semanais seguintes.

O Parque Nacional facilitaralle a cada traballador unhas dependencias para pernoctar e para a preparación da comida.

O ano natural divídese en dous períodos de prestación de servizos: un ordinario e outro extraordinario.

O período extraordinario abarcará 4 meses que se corresponden cos meses de xullo, agosto e setembro máis 1 mes a determinar por resolución do órgano directivo do que dependa o Parque Nacional.

No período ordinario establécense unhas xornadas de traballo de de 7 horas diarias e no período extraordinario de 12 horas diarias. **Para estes efectos**

considérase xornada de traballo o tempo necesario para trasladarse ao centro de traballo.

O persoal do Parque Nacional terá dereito a percibir unha indemnización por razón de servizo correspondente a unha axuda de custo por manutención por cada día de prestación efectiva de servizos.

Sétimo.- Comisión de seguimento.

Créase unha comisión de seguimento do disposto neste acordo, que estará integrada por un representante de cada unha das organizacións sindicais e polos representantes das consellerías que contan con efectivos da escala de axentes facultativos medioambientais, designados polas respectivas secretarías xerais.

Oitavo.- Coeficientes redutores xubilación

A Xunta de Galicia se compromete a colaborar, aportando os datos e documentación que se precise, coas organizacións sindicais na solicitude que estas fagan ante a administración competente en materia de coeficientes redutores da idade de xubilación deste colectivo.

Disposición Adicional primeira.- carreira profesional.

Este persoal tamén será beneficiario de todas as melloras que se poidan establecer no ACORDO POLO QUE SE ESTABLECEN AS BASES DA CARREIRA PROFESIONAL NO ÁMBITO DO PERSOAL FUNCIONARIO DA XUNTA DE GALICIA (MESA SECTORIAL DE FUNCIONARIOS PÚBLICOS) que actualmente se está a negociar entre a Xunta de Galicia e as Organizacións sindicais da mesa xeral de empregados públicos.

Disposición Adicional segunda.- xornada anual.

En relación ao ACORDO ENTRE A XUNTA DE GALICIA E AS ORGANIZACIÓNS SINDICAIS.....POLO QUE SE AMPLIA O ACORDO DE 18 DE OUTUBRO DE 2017 PARA O DESENVOLVEMENTO DUN PLAN DE ESTABILIDADE NO EMPREGO DOS SERVIZOS PÚBLICOS que se está a negociar, está incluído un plan para o establecemento de outras xornadas anuais inferiores para o persoal con xornadas a quendas, nocturnas ou especialmente penosas entre os que se atopa o persoal das escalas de axentes forestais e ambientais da Xunta de Galicia.

Disposición transitoria primeira.-Medidas orzamentarias

As medidas retributivas que se prevén no presente instrumento están supeditadas á entrada en vigor das normas orzamentarias que habiliten a súa efectividade.

Santiago de Compostela agosto de 2018.

Pola administración

Polas Organizacións sindicais